

名山縣志卷一

知縣事遵義趙 懿纂輯

星野

十二次分野當鶉首實沈

[周禮保章氏]以星土辨九州之地所封封域皆有分星以觀妖祥鄭注元謂大界則曰九州州中諸國中之封域於星亦有分焉其書亡矣堪輿雖有郡國所入度非古數也今其存可言者十二次之分也實沈晉也鶉首秦也云云[漢書律歷志]實沈初畢十二度終於井十五度鶉首初井十六度終於柳八度[續漢書律歷志]引月令章句自井十度

名山縣志卷一

星野

一

至柳三度謂之鶉首之次秦之分野[續漢書郡國志]引帝王世紀自井十六度至柳八度曰鶉首之次今秦分野[晉書天文志]班固取三統歷十二次配十二野其言最詳自東井十六度至柳八度爲鶉首秦之分野屬雍州又有費直說周易蔡邕月令章句所言頗有先後費直起井十二度蔡邕起井十度[隋書地理志]雍州上當天文自東井十度至柳八度爲鶉首得秦之分野梁州於天官上應參之宿周時梁州以併雍部[唐書天文志]東井與鬼鶉首也初東井十二度餘二千一百七十二杪十五太中東井二十七度終柳六度自漢三輔及



北地上郡安定西自隴坻至河右西南盡巴蜀漢中之地及西南夷犍爲越巂益州郡極南河之表東至牂柯明史天文志井九度至柳三度鶉首之次四川布政司所屬雲南布政司所屬皆井鬼分引大明清類天文分野書二十八宿分野當井鬼入參一度

春秋元命苞東井鬼星散爲雍州分爲秦國史記

天官書觜觶參益州東井與鬼雍州漢書天文志同星經畢

觜參魏之分野益州東井與鬼秦之分野雍州漢書地理志秦地於天官

東井與鬼之分野也其界自宏農故關以西西南有巴蜀廣漢犍爲武都又西南有牂柯越巂益州

名山縣志卷一

星野

二

皆宜屬焉淮南子天文訓東井與鬼秦廣雅呂氏

春秋高誘注東井南方宿秦之分野晉書天文志

魏太史令陳卓言郡國所入宿度范蠡鬼谷先生

張良諸葛亮譙周京房張衡並云蜀郡入參一度

犍爲入參三度牂柯入參五度巴郡入參八度唐

書天文志東井據百川上流故鶉首爲秦蜀墟得

兩戒山河之首宋書地理志陝西路當東井與鬼

之分川陝四路與秦同明史天文志四川布政

司所屬惟綿州觜分合州參井分餘皆井鬼分

北斗七星分野當開陽一星斗第六星開陽

史記天官書北斗七星所謂璇璣玉衡以齊七政



杓構龍角衡殷南斗魁枕參首用昏建者杓杓自  
華以西南夜半建者衡衡殷中州河濟之間平日  
建者魁魁海岱以東北也漢書天文志同春秋文耀鉤荆  
州西南至岷山北距烏鼠梁州屬開陽周禮疏梁  
主閩陽廣雅梁州之西屬北斗開陽一星續漢書  
天文志注引星經玉衡第二星主益州常以五亥  
日候之己亥為巴郡蜀郡牂柯癸亥為犍為  
三台分野當中台之上

論語摘輔象梁雍屬中上本注中台之上九州繫  
於三台一台各有上下

五緯分野當太白狼弧

史記天官書秦之疆也候在太白占於狼弧正義

太白狼弧皆西方之星故秦占候也

漢書天文志同續漢

書天文志注引星經太白金華陰山涼州益州

千支分野當庚辛

史記天官書庚辛華山以西漢書天文志庚秦辛

西南夷又午秦

按一邑之微本無星野可確指然棄置不錄又有  
缺略之嫌爰依據諸書臚次六事以完一書之體  
云

建置

禹貢梁州之域



酈道元水經注今漢中巴郡汶山蜀郡漢嘉江陽涪陵陰平廣漢新都梓潼犍爲武都上庸魏興新城皆古梁州之地胡渭禹貢錐指梁州下梁南自宜賓以西至會川諸州縣凡在瀘水馬湖江之北者皆梁域宜賓以東至巫山諸州縣凡在大江之北者皆梁域

殷周爲西南夷青衣羌國

尚書牧誓庸蜀羌髳微盧彭濮人孔安國傳八國皆蠻夷羌在西蜀叟禹貢錐指武王伐紂誓於牧野諸侯會師者稱之曰友邦豕君而庸蜀羌髳微盧彭濮八國則稱曰人不以諸侯待之傳曰八國

名山縣志卷一

建置

四

皆蠻夷戎狄屬文王者正義曰此皆西南夷也常璩華陽國志七國稱王杜宇稱帝號曰望帝禪位開明位號叢帝叢帝生盧帝盧帝攻秦至雍生保子帝帝攻青衣雄長獠夔水經注漢嘉縣故青衣羌國也竹書紀年梁惠成王十年瑕陽人自秦道岷山青衣水來歸趙抃成都古今記成都府西南蠶叢氏初爲蜀侯後爲蜀王教民蠶桑呼青衣帝秦屬蜀郡爲嚴道縣

漢書地理志蜀郡秦置南史劉峻傳青衣水左側並是秦嚴道地唐魏王泰括地志嚴道縣今雅州所理也秦昭王相嚴君疾封於此故縣有此稱李



吉甫元和郡縣志名山縣本嚴道縣地漢制縣有蠻夷曰道樂史太平寰宇記秦始皇二十五年滅楚徙嚴王之族以實其地故曰嚴道

漢初爲蜀郡嚴道青衣二縣地屬益州武帝元封間屬沈黎郡天漢四年置兩部都尉一治青衣

漢書地理志蜀郡下縣十五有青衣嚴道屬益州又武帝改梁曰益華陽國志高后六年城犍道開青衣又元封六年邛笮爲沈黎郡合置二十餘縣

天漢四年罷沈黎置兩部都尉一治旄牛主外羌

一治青衣主漢民

兩部東漢志作西部水經注同

又武帝初欲開

南中令蜀通犍青衣道建元年犍道令通之費功

名山縣志卷一

建置

五

無成百姓愁怨司馬相如諷諭之使者唐蒙將南入以道不通執令斬之歎曰忝官益土恨不見成都市蒙卽令送成都市而殺之蒙乃斬石通閣道故世爲諺曰思都郵斬令頭云後蒙爲都尉治南夷道元和郡縣志漢遷淮南王長於蜀嚴道歐陽忞輿地廣記漢徙彭越於青衣按此高帝孝文時東漢光武建武十九年以青衣置郡順帝陽嘉二年改縣名漢嘉

東漢郡國志蜀郡屬國漢嘉故青衣陽嘉二年改

有蒙山華陽國志王莽遷公孫述爲導江卒正治

臨邛建武元年稱皇帝水經注公孫述之有蜀也



青衣不服世祖嘉之建武十九年以爲郡安帝延光元年置蜀郡屬國都尉青衣王子心慕漢制上求內附順帝陽嘉二年改曰漢嘉嘉得此良臣也

前漢志青衣下應劭曰順帝更名漢嘉

蜀漢置漢嘉郡漢嘉縣隸焉

晉書地理志蜀置漢嘉郡統縣四漢嘉徙陽嚴道旄牛華陽國志漢嘉郡闕王象之輿地紀勝雅州靈帝時屬漢嘉郡顧祖禹方輿紀要三國漢改漢嘉郡並據晉志

晉因之永嘉後爲夷獠所據

西魏廢帝二年立蒙山郡改蒙山縣

元和郡縣志李膺記自晉永嘉之後李雄竊據此地蕪廢將二十紀夷獠居之西魏廢帝始更招攜立蒙山郡屬邛州舊唐書地理志晉末大亂夷獠據之西魏開生獠於此置蒙山郡領始陽蒙山二縣太平寰宇記西魏廢帝二年置蒙山縣屬蒙山郡

隋開皇十三年改縣曰名山隸雅州煬帝大業三年隸臨邛郡

隋書地理志西魏置始陽郡及蒙山郡開皇初廢蒙山郡置雅州十三年改始陽曰蒙山改蒙山曰名山煬帝大業三年廢雅州置臨邛郡名山縣屬



之元和郡縣志隋開皇十三年置蒙山縣並鎮按此謂改始陽爲蒙山也

唐武德元年分縣置百丈鎮貞觀八年置百丈縣並隸雅州

舊唐書地理志雅州都督府隋臨邛郡武德元年改爲雅州領嚴道名山蘆山依政臨邛蒲江臨溪蒙陽漢源火井長松靈關揚啟嘉良大利陽山十六縣其年割依政臨邛蒲江臨溪火井五縣置邛州漢源陽山二縣置登州二年置榮經縣六年省嘉良揚啟大利靈關蒙陽長松六縣九年廢登州還以陽山漢源來屬儀鳳四年置飛越大渡二縣

大足元年又割漢源飛越二縣置黎州神龍三年廢黎州漢源飛越屬雅州開元三年又割二縣置黎州又置都督府天寶元年改爲蘆山郡乾元元年復爲雅州都督羈縻一十九州也舊領縣五嚴道名山蘆山百丈榮經名山嚴道縣地魏置蒙山縣隋改爲名山也百丈嚴道縣地在漢臨邛南百二十里有百丈山武德置百丈鎮貞觀八年改鎮爲縣輿地紀勝引圖經唐武德元年置百丈鎮太平寰宇記名山唐貞觀初改爲漢源縣取漢江源以爲名今復爲名山縣按新舊唐志皆不載疑誤五代時屬永平軍



王象之輿地紀勝通鑑唐僖宗光啟元年以邛蜀黎雅置永平軍大順元年廢後唐瑋王清恭元年復置永平軍節度使顧祖禹方輿紀要五代史王建時以雅州爲永平軍一云後唐清泰初孟知祥置誤按通鑑唐僖宗文德元年十二月割邛蜀黎雅置永平軍以王建爲節度使治邛州昭宗大順二年十月以永平節度使王建爲西川節度使廢永平軍後唐瑋王清泰元年蜀置永平軍於雅州以孫漢韶爲節度使胡三省注唐末置永平軍於邛州後徙雅州蓋莊宗滅蜀而廢之今後蜀復置之也五代史職方攷雅州在梁爲蜀永平歷唐晉漢周四代皆歸後蜀

名山縣志卷一

建置

宋乾德三年隸雅州熙甯五年廢百丈縣爲鎮元祐二年復百丈縣

宋史地理志成都府路雅州蘆山郡軍事乾德三年平蜀仍爲雅州領縣五嚴道蘆山名山百丈榮經名山熙甯五年省百丈縣爲鎮入焉元祐二年復百丈

元初名山百丈皆屬嘉定府路至元九年屬土番宣慰司

元史地理志陝西等處行中書省土番等處宣慰司都元帥府雅州領縣五名山蘆山百丈榮經嚴



方輿紀要雅州元初屬嘉定路尋屬吐番宣慰司  
明洪武十年省名山入雅州十三年復置省百丈入  
名山隸雅州

明史地理志雅州領縣三名山州東北洪武十年  
省入州十三年十一月復置東北有百丈縣元屬

州洪武中省

明縣令范元體記我朝洪武七年復置名山十五年省入雅州與史不合

國朝因之雍正七年陞雅州爲府縣仍隸焉

疆域 附形勝

東至釣方池交邛州蒲江縣界六十里南至車嶺鎮  
交嘉定府洪雅縣界四十五里西至金雞關交雅安  
縣界十五里北至蘆山岡交蘆山縣界三十里東南  
至馬鬃嶺交眉州丹稜縣界七十里西南至清江堰  
交雅安縣界二十里東北至夾門江交邛州界七十  
里西北至蒙頂交雅安縣界十五里廣七十五里袤  
六十里至府四十里至省三百三十五里至

京師六千零三十五里

通志府志界至小異

鄉凡三大同鄉延鎮上鄉延鎮下鄉編里凡三日在  
城曰遵義曰體仁凡二十一甲在城一甲遵里十甲  
體里十甲

形勝輿地紀勝引道里記西通礪門南通沈黎北通

蘆山東出者臨邛之蒲江嘉定之洪雅相接又引  
少微百丈院記南山擁抱如張弓偃月氣象郁郁間



古樂郊壽域也通志蒙山峯奇青衣水秀又引舊縣志居邛嘉之上游啟西南之後戶負蒙麓而抱丹稜枕金雞而濯玉液左則蓮峯突兀右則沫水滌涸路當孔道皇華留百丈之甘棠城近仙蹤紫府綿千秋之俎豆地多高而少下田多瘠而少腴

新製八景舊有八景曰蒙頂遐眺紫府真樓月窟人家石城臺閣虎跳飛橋龍迴深壑曉驛雲容石井茗况

蒙頂仙茶 紫霞聖蹟 蓮峯夕眺 青衣春耕  
棲霞晚鐘 迴龍瀑布 石城夜月 羅繩雪晴

城池

縣治城垣西北跨月華山有小水自山右來為濠東

南環青衣水為池本土城明正統中築設門二嘉靖末知縣范元愷修葺增補改四門易東門以石崇禎甲申寇亂城燬

國朝康熙四年知縣李應宗重築石城高一丈七尺周四里七分計八百四十二丈雍正元年知縣徐元禧重修製四門名東曰青雲南曰留青西曰上清北曰月華各建樓於上嘉慶三年知縣孫真儒榜東門曰大幕鍾靈西門曰蒙山挺秀光緒二年知縣宋大奎改南門曰文明門北門久經閉塞列置礮臺以備防守蓋北城外不數里即崇山峻嶺崎嶇厯落氣脈自蒙山來也



明知縣范元愷名山縣修改記

記多訛脫

嘉靖四十有

二載仲春月望前四日縣堂修成鄉大夫胡三山劉新池王若衡劉霽山郝四霞程清泉諸公造余曰公蒞我邑四春於茲修改良多每見書法無益於事大必略有係於民細不遺今皆人所不及欲爲而未能切於爲民者願紀諸石以示永求請之堅也乃言曰修改有二難有一要上疑其私下病其厲不擾民傷財可爲而爲所以行之者一也當爲弗爲可已弗已均之弊也是以有髮歲一櫺不勝其病而終日櫺之不病也自今言之縣堂行令致民卑隘兩重既不大壯且失制矩茲亦庶乎高

明寬廣矣其餘吏舍損漏公廨塌毀用咸加葺正衙二堂東西分設倉庫俱右元武青龍空虛安是衙堂後倉庫左焉監獄歲積欲頽以南衙修於倉基監房立其上儀門外左原土地祠比前稍北右設寅賓館陰陽醫學則舊在監址也大門過雨水自中出樓復過峻去土平阻不危不流申明旌善二亭從新更立北門後山縣中正脈西門溪水逆遊散漫去其門培築決崆改順城合於大河城腳地狹北易立水神祠與陸逵換地南折去李早春房一間通前抵後助工費以舊壇地與焉東門土築今砌條石矣縣門首久欲開街未成折去張省



祭房樓一間二重趙廷祿長厦一路任嘉斌樓半  
間成景賢王文烈基少侵張汝明周月東房全去  
補地領價匪有相虧儒學 先師廟遷在城外

荒遐繞徑茲乃復還其故東西廡每止六間又各  
添以四楹櫺星門易出數丈左右建名宦鄉賢二  
祠廟門甬壁傾倒樹繪高屏學門所履轉灣屋塞  
對巷社稷壇土主廟高在面山風雲雷雨山川壇  
逼鄰人戶以社稷爲於西郊南向風雲雷雨東郊  
北向土主廟造於西通衢初到時遷社稷壇在東  
大道仍未動而爲接官亭迎春所也欲思修改大  
門進深五丈左右起兩小亭門首豎一憲臺坊焉

凡此之役公餘督率所用官工食之人匠邑日  
支米升量度經營增添買補躬行捐處百姓不知  
此可已信以對人言者也如勞民傷財作無益害  
有益吾弗爲之矣餘若集市西關今土主廟學前  
令平正街道路青岡坪嶺平治於麓萬工寺坡坪  
治於川坊牌肅憲甸宣宣化曰解元進士翰林歷  
科舉人其他鄉賢之肇稱崇祀伊始鄉飲之定正  
禮文聿興見年以月易歲濫費盡省祭祀各行分  
買多派悉裁門阜除革餘夫民快陳罷歇役房錢  
幫助里甲黎糧告分屯軍折色納戶役銀櫃中本  
色每石去減樣米不克自任一意難必盡協輿情



三年之間心勞日拙誠不覺時序之易也恆思循  
良之吏多相安於無事而作南門爲長府聖賢不  
取紛更之戒庸人之擾功過能相半乎極知取厭  
重譏而復瑣瑣好細語者亦惟諸公之命以記實  
且言之不文有不暇計耳

國朝建南道張元凱重修名山縣治記蒙山之下有邑  
焉里可百計民瘠而地僻蓋因蒙以得名也邑之  
人士篤於文行明時翰苑鼎秀科第聯翩雅安三  
屬此其傑出者風流文采與雅安互爲甲乙明季  
兵凶縣治俱廢往令茲邑者惟於斷垣荒草中誅  
茅結屋以竹籬數片檻護官衙草椽數枝遮蓋廳

事而已今

名山縣志卷一

城池

十三

天子御極之四年選功臣子弟弼中彪外者宰夫郡縣其  
法才智優長者授荒壤意取盤根錯節以辦利器  
而李君英姿雄發以大父光祿金紫大夫都憲公  
之廕應選銓曹識

天子旨簡李君出宰名山名山荒殘之區李君能稱  
聖意揮壯猷爲

朝廷教養此土暮月而邑治招撫流離數百家勸墾荒  
蕪若干頃時和年豐民亦勞止百廢俱興李君曰  
縣治不可久隳也爲

天子吏而草茅其居澗跡市廛使錐刀之聲與琴鶴相嘈



雜且也城濠不理往來無禁四郊之內鴝鷓息而  
虎豹藏豈

命吏之所宜哉於是搜囊金捐俸粟問木於山問瓦於陶  
工資匠犒以丹堊之需悉出諸令於戲有此賢令  
下化民良而庶民子來者絡繹焉未幾而城垣縣  
署胥煥然矣余曰此真神明宰也往者己亥之秋  
余招撫邛雅帥諸僞爵鎮旋詣錦官停驂此邑其  
荒蕪不治姑不足論以其草昧未定民皆驚鴻既  
而壬寅之冬甲辰之秋復以進謁之役兩經取道  
而城之頽濠之塞街房縣置之蕭索去己亥草昧  
特未遠過也今甫周歲余足跡又由於此孰知起  
敝崇衰若此其速也而况采木於山不驚桑柘募  
工於市不擾耘鋤如此良令得綦布星列於天下  
焉堯舜之世直可平躋余且爲

天子賀得人因書其事以記之且使後之來者知李君保  
釐之任皆於此也是爲記

府志引琴餘日劄北

門既塞而南門旁溪行者亦少惟東西二門通西  
藏大路霏雨朔塌土石填淤行人甚苦知縣徐元  
禧屢次捐修而東築西傾徒費工資元禧謂此非  
大興土木不可遂於雍正癸卯春顧石工填砌完  
固益以城樓五間并製門名東曰青雲以門接青  
雲橋也南曰留青以青衣江逆流而門扼其要也



西日上清以門外蒙山有上清峯也北日月華以門在月華山也

公署

縣署在月華山麓明洪武間建嘉靖四十二年知縣范元愷重修規制始備正衙二字東西分置倉庫前列六房監獄在其右儀門外左爲土地祠右設寅賓館陰陽醫學大門外左爲申明亭右爲旌善亭諸皆完整據范後毀於兵燹

國朝康熙四年知縣李應宗重修稍湫隘八年知縣朱景辰擴修通志康熙六年知縣朱士英重修未詳孰是四十四年知縣趙承燾增修東花廳榜曰霽月軒前爲花園後有方池

均皆圯廢至道光十一年知縣莫瑞堂重修其制正堂居中前爲露臺下爲甬道中

聖諭坊書

欽頒爾俸爾祿民膏民脂下民易虐上天難欺四語與堂相對左右九房六科鹽茶倉儲承發對承發爲繫禁所前儀門外爲甬道左蕭曹祠右監獄門前爲頭門樹壁正堂後二堂又後正室左卽東花廳右爲射圃郵驛房在射圃之右常監倉在東花廳之左社濟諸倉則在後山上自藍道貫境後治署半燬同治八年知縣□□重建

聖諭坊光緒六年知縣周綸翊重葺大堂而吏舍頽塌不完



正室亦東傾西圯上漏下溼當更新之也

雍正元年所頒

上諭諭知州知縣朕惟國家首重吏治爾州牧縣令乃親民之官吏治之始基也貢賦獄訟爾實司之品秩雖卑職任綦重州縣官賢則民先受其利州縣不肖則民先受其害膺茲任者當體朝廷惠養元元之意以愛民爲先務周密蒞屋綏輯鄉里治行果有其實循卓自有其名非內聚賄而外干譽謂之名實兼收也全省吏治如作室然督撫其棟梁也司道其垣墉也州縣其基址也書云民惟邦本本固邦甯夫所以固邦本者在吏治而吏治之本在州縣苟州縣之品行不端猶基不立則室不固庸有濟乎

皇考臨御六十一年灼知州縣之重特行引見咨詢明誠至詳至慎其有廉能之員每不次超擢以示鼓勵今海內羣黎皆

皇考所懷德也朕膺

宗社重寄思繼

皇考之治功惟爾州縣諸臣具有父母斯民之責其爲朕立之基址以固邦本焉誠能潔已奉公實心盡職一州一縣之中興仁興讓教孝教忠物阜民安刑清訟簡朕將升之朝之用作股肱如或罔念民瘼恣意貪婪或朘削肥家或濫刑逞虐或借刻以爲清或恃才而多事或諂媚上司以貪位或任縱胥吏以擾民或徇私逞欲以上虧國帑王章



者將恐人指議而皆以爲賢矣何官勒石而賢者  
自賢否者自否賢否尙不相半耶噫人於民監豈  
眞不戒心爲裕變塞或因改患得患失無所不至  
忍心害理何恤人言嗜進位高自以爲身寵矣不  
知禹稷顏回同道弗繫虛名肥己金多自以爲家  
温矣不知夷齊景公殊稱惟存實行無愧無負欲  
仁得仁斯可以從政刻薄諛諂乞哀驕人失其本  
心惡在其爲民父母哉斯民也三代之所以直道  
而行也按迹而數惠愛在人者斯思無敦害人殃  
民者疾讐不暇庸庸者無文則斯石之立亦如春  
秋無賞罰而有是非者榮辱之主也自茲以後其  
可不慎歟

典史署在縣治大門右明嘉靖四十二年知縣范元  
愷建

國朝康熙八年知縣朱景辰重修後失攷

千總署在南門內右側乾隆元年建

僧會司 道會司均無定所 陰陽學醫學今廢

養濟院在城西街

坊街

縣城只東西正街北街已無闔闐南則一二隘巷

綸綽褒賢坊

縣治左爲鄉  
賢晏倫建

岷峨毓俊坊

縣治右爲鄉  
賢晏朝寅建



學街坊在北街口舊時文廟在北街今慰忠祠即其址

文昌宮坊在東街中

胡公德政坊在太平場為知縣胡壽昌建

繆公德政坊一在東街一在西街為知縣繆延祺建

董公德政坊東街為知縣董寶齋建

節義流芳坊東街口為儒童鍾祖明妻李氏旌表節孝

名光女史坊迎春坪為監生蔣興鎬妻王氏旌表節孝

柏舟再詠坊西街口為處士胡觀濤妻王氏旌表節孝

星月交輝坊西街口為監生張星燦妻戴氏妾白氏旌表節孝

垂芳奕禩坊西街口為生員胡定字妻王氏旌表節孝

貞壽之門坊先農壇為貢生劉仕熙母張太君旌表百歲

烈女坊遵三甲青江堰下為烈女楊丁秀建節烈坊體五李興貴之女

市鎮

三里凡二十八堡十八場林岩日堡市集日場

在城一甲 清欄堡東 大平堡西

遵里十甲 門坎堡甲三 老虎堡甲三 沙潭堡甲四

涌廟堡甲五 岱宗堡甲七 五花堡甲九 水月堡甲十

體里十甲 礮礮堡甲一 瓦溝堡甲二 中正堡甲三

古城堡甲三 三江堡甲四 富充堡甲四 萬古堡甲四

官江堡甲五 清堡甲六 甘溪堡甲七 長腰堡甲七

土墩堡甲八 西界堡甲八 黃萬堡甲八 樂道堡甲九

兩合堡甲九 黑堰堡甲九 深溝堡甲九 鐵山堡甲十



在城場城內三六九日集

迴龍場一名牛皮場體一甲城南三十里二五八日集

新店場體三甲城東二十里一四七日集

萬古場體四甲城北二十里二五八日集

中峯場體四甲城北四十里三六七日集

朱家場體六甲城東北四十里二五八日集

觀音場體七甲城東北六十里三六七日集

廖家場體七甲城東北七十里四七七日集

蓮花場體七甲城東北七十里三五八日集

百丈場體八甲城東四十里二五八日集

毛家河體八甲城東七十里一四七日集

名山縣志卷一 坊街 市鎮

馬鬃嶺體九甲城東南七十里三五七日集

合江鎮體九甲城東南七十里一四七日集

太平場一名喇叭場體九甲城南四十里一四七日集

雙河場體十甲城東南五十里二五八日集

永興場一名清江堰體三南二十里甲城西一四七日集

新寺場體六甲城南三十里三六九日集

車嶺鎮體十甲城南四十里三六十日集



序

知名山縣事趙君悔予作縣志十五卷標目三十有四中間學校分上下列傳以人士忠節孝義方外列女爲子目出藁本視余並屬爲序余惟志備一方掌故上爲國史所取裁固亦史也特未應以史名耳周官外史掌四方之志誦訓掌道方志小史掌邦國之志蓋後世志乘之權輿志體兼收並蓄大要不過土地人民政事而土地以居人民政事以治人民則三者之中人民尤要官司舉事無在不關民修志亦爲民也民本也志末也民質也志文也忘本而逐末離質而耀文此之謂不知務藉使民事不治斤斤日吾

將修志是虞廷不命五臣而水火金木土穀可垂令典成周不分六職而和親康樂安平可勒成書也不已慎乎必也先成民而後致力於志及其興養立教之暇以修其徵文考獻之事筆之於書非虛器傳之於世爲遠模所謂修辭立誠也以視不務民義競尙空談者侷乎遠矣名山地瘠民貧俗尙敦樸邊界與邛州蒲江丹稜洪雅大牙相錯匪徒出沒固圍爲難咸同之間藍何諸逆迭擾川南縣城不守者再延袤百餘里中創鉅痛深至今三十餘年元氣猶未復也近編戶籍民數較咸豐末年略減十之三四凋敝景况可想而知悔予甫下車余方官雅州知府遂見余



府署爲余言民疾苦甚悉翼日再見於地方利病吏治隆汙言之益加詳移晷始去未嘗一語及志事也則且編聯保甲平均征斂清理訟獄宣講

聖諭暇則輕騎滅從出舍於郊或入杏花之村或稅棠陰之駕往往披星而出戴月而入凡所以思民艱圖民易者勤勤焉懇懇焉惟日不足也此時雖欲修志庸遑暇乎數月之後庶政略舉向所欲措於民者亦旣因地制宜各有端緒乃今可以議修志矣縣舊無志前知縣徐君元禧有志三十卷今不可見然則悔予此志乃創修也雖然其事則創而志材固早備矣彼其編聯保甲平均征斂者非卽戶口田賦之志材乎

清理訟獄宣講

聖諭者非卽風俗學校之志材乎披星而出戴月而入日往來於四竟之內者非卽城池疆域關隘津梁之志材乎方志義例尤重人物豈有披星而出戴月而入日往來於四竟之內耳目猶慮不周採訪猶慮不實者乎至全書之中遠者大者繁重者纖悉者仰而觀俛而察者尋墜拾遺博覽而約取者何莫非輕騎滅從出舍於郊之時聞所聞見所見儲爲志材以備載筆之用者乎若夫參之羣書以通其變稽之案牘以提其綱凡修志者皆然卽悔予亦不能異也王貽上評隲海內名志關中最多固作者雅擅三長亦以邑



人修邑志勢便而易爲力耳悔予以邑宰修邑志舉  
平日所不能自己於民與民所不能自爲而有待於  
經畫者身親其事卽手訂其書辭尙體要不外政貴  
有恆則謂此志之修爲名山之掌故也可爲悔予之  
治譜也可悔予等功當報最行遷秩去矣後來者莅  
茲土地修其政事以撫柔此人民第覽斯志一縣之  
事已瞭然如指諸掌是以舊政告新尹也抑悔予此  
舉伯兄幼漁實資討論雖纂次何篇裁定何義不必  
區分類別要其爲多文之士且究心於史學則斷可  
知嗚呼穎濱文采可謂不孤矣光緒十八年七月旣  
望鄂崔志道序



自敘

昔之爲志者半因舊志刪補或藉眾力成之予之爲  
名山志也無舊志可據無同事相助治政之暇或涉  
歷山川或咨訪故舊或搜剔於殘碑斷碣或尋檢於  
破牘零箋有所得輒手錄之幼漁伯兄間一至署相  
與商確二年餘始粗有端緒念縣當殘破之後文字  
闕如偶有遺編可采者少故不專立藝文一門然概  
爲裁汰又覺文獻無徵過形簡略因取詩文之可存  
者附錄各條之下人物傳外紀間附遺文猶此意也  
此志事等草創明知不免疎略蕪雜之病然存此一  
編後有繼者補苴裁擇或亦有所依據夫古今撰述  
新舊並存致足以資攷證其有續修補作以及辨非  
證誤幸莫別成爲篇毋事就此點竄令世並有所見  
也行將更代聊書此以貽來者云爾光緒十八年八  
月遵義趙懿自敘



序

志者誌也誌其道里人民以及風俗物產政賦所以昭事實而備參考誠致治之要圖也趙君悔予剖符名山甫下車卽以民事爲己任舉凡縣治之廣狹人民之多寡迄乎分野度數古今陳蹟以及學校租賦無日不往來於胸中於是綜星野山原津梁等爲三卷次學校壇廟寺觀等爲四卷更次以物產風俗戶口兵防職官等爲五卷而以選舉列傳外紀終之都爲十五卷查名山舊無志前知縣事徐君元禧有志三十卷亦湮沒不存悔予乃於案牘之餘參考搜輯加以斷制條分而縷析之俾後之官斯土者瞭如指

掌其視楚令尹子文之必以政告勤懇爲尤摯矣曩者余攝篆雅州聞悔予名悉其爲政不憚勞瘁凡荒村僻壤皆親歷履勤於忠孝節義有關風化舊湮沒而不彰者咸採擇而表揚之余竊歎悔予關心民瘼不求暇逸舉直錯枉得爲政體及悔予來見出所輯縣志視余請爲之敘并云與伯兄幼漁實共成之噫名山山縣也地本瘠區復經兵燹宰斯邑者或不免患寡患貧而悔予乃能實心行政不存畏蕙復於錢穀簿書之暇與伯兄徵文考獻援古證今輯縣志付手民刊定不獨名山人民當視斯志如甘棠卽後之繼悔予來者亦當視斯志如拱璧也余幸際其盛夫



何敢以不文辭桂林熊紹璜序

名山縣志 敘

二



序

薇元年十二三自燕至蜀時家君作宰名山開闢六千里省覲親庭見家君日與邑孝廉樊包高人傑等治軍書周畫糗梁咨度利鈍顏色憔悴退竊慮念不敢以節勞請旣而滇寇殄逐殆盡稍稍與耆老子弟講學議禮治未備家君奉駱文忠公檄赴劉霞仙方伯營次雖與高孝廉等論邑志宜輯未遑及也閱三十載同年友趙悔予令斯邑乃有搜輯縣志之舉夫志爲言識也漢魏以降軌躅攸分陳留風俗襄陽耆舊之傳荆楚歲時宜都山川之記品藻羣流詮敘殊俗後之人兼綜條貫于是乎有郡縣之志我

名山縣志卷一

敘

一

朝鴻儒碩彥接踵而起鱗次周比修續相仍可謂詳矣然古之地志山川方域風俗物產而已自元和郡縣志乃識古蹟太平寰宇記爰及藝文元明以來體例相沿列傳侔乎家牒藝文溢於總集事非剗始則芟薙爲難名山僻在蔡蒙二百餘年尙屬初牒本末始終無庸遷就一也學無本源則義理乖迕宋高似孫刻錄簡古不易而陳振孫譏其怪僻則以其依附韓侂胄也君得其外王父鄭子尹先生爲學門逕孝友篤誠爲時侑尙其言皆儒者之言具有微指不同鈔胥二也蒐採葺比不漏不支徵引書籍必載出處明韓邦靖撰朝邑志言約事盡咸以爲絕特之作而不知



本宋人澉水志之例康海武功志藝文皆散附各條之下此用吳郡志例君此書亦兼用其例三也元馮復京郭薦昌國州圖志世稱其簡而有要而環山三圖佚而不存論者惜之莆田姚氏嶺海輿圖略前代而詳今茲略古蹟而詳阨塞君長於六法煙雲在胸不假他人狀繪質雅四也昔王鑿撰姑蘇志以楊循吉喜謠詠不許共事而自與郡人杜啓祝允明日相討論發凡舉例考核精當君與伯兄幼漁皆文章魁傑於疏邈寥闕之中窮耳目所及爲之凡卷十有五目三十有四文簡事賅訓辭爾雅五也具此五者絲牽繩貫始末瞭然後有作者疏之瀹之亦於此得其

大凡矣大興胡薇元序



序

名山山縣也去成都三百餘里自成都南行數日皆平原曠壤至縣境始有山而蒙山峩峩峯律昂首天外縣治遂枕其麓蒙溪諸水環而裹之余以光緒十六年八月歸自京師省親仲弟淵叔官所遂登五頂以瞰青衣沫江想望禹蹤南眺三峩雲雪歸而問俗考故乃知縣舊無志康熙間知縣徐君元禧曾爲志三十六卷亦久不傳於是循覽通志府志及他輿地紀述諸籍攷求建置古今山川里道人文士女終亦疏邈寥闕若坐空山而求朝廟有冥然莫自得者當其時淵叔到官甫三月亟有志於纂述而其體目裁

獨立耳既余還山省墓再遊幽燕淵叔築亭廨舍東圃陳書滿室狼籍紙硯文書聽斷之鏘輒入坐其中肆究而博參掇幽而搜佚雖至夜分燈灺不少輟又時乘肩輿行野問民瘠苦所在則凡山谷之脈絡溪澗之經流故老傳說之近遠斷碑荒碣之紀載靡不踐涉周於足訪攬窮於目營於耳而審於心懇懇乎懷鉛握槧之風焉越二載之精勤及今年六月余復歸省而其書且告成矣淵叔以抵余復校一通余以謂自班孟堅始爲地里作志然史之有志其一體耳若今府州縣之志乃周官小史所掌邦國之志實據史之全體而爲之不全體不足以備府州縣也今所



成書爲卷者十有五爲目者三十有四凡茲縣之所  
必備不敢有或略焉而於建置山川人物風俗斯數  
事者尤爲旁證曲述著見本末特所盡心雖其地居  
樸略文獻無徵其不可得而攷者或尙不希而其所  
得而述焉者大要略具於斯矣蓋自秦漢郡縣下至  
西魏置立以來世欲有所省覽或庶幾皆得其要歟  
淵叔又何疑歟且余尤有念者昔余與淵叔侍親新  
甯任所嘗於縣欲私有纂記其時身閒境暇卒以因  
循放逸未果成書而大人解簪告致遂不得復履其  
地欲更成書而不能至今心以爲闕人生有作時過  
則難今淵叔以從政之身案牘敦積又名山地當官  
道迎送瞻候絡繹不絕卒能乘間取隙交治雜爲以  
就斯事其亦鑒我於曩者乎然則是編之成余又何  
幸其果遂有成也光緒十八年閏六月立秋日遵義  
趙怡序



名山縣志纂修姓氏

督修

欽命布政使銜賞穿黃馬褂 奏署四川 分巡建昌兵備道 周振瓊

欽命二品頂戴賞戴花翎四川分巡建昌兵備道張華奎

補用道 特授四川雅州府知府前翰林院編修崔志道

欽加鹽運使司銜 奏署四川雅州府知府熊紹璜

纂輯

貴州遵義縣舉人 趙怡

知名山縣事 趙懿

督採

名山縣訓導 屈為龍

名山縣志卷一

姓氏

名山縣典史 張鈺

採訪

名山縣舉人 張錫衡

名山縣舉人 彭廷燮

名山縣舉人 趙炳章

名山縣優貢生 吳之英

名山縣拔貢生 吳福連

名山縣貢生 劉仕熙

名山縣貢生 胡自南

名山縣貢生 文炳

名山縣貢生 郭青



名	名	名	名	名	名
山	山	山	山	山	山
縣	縣	縣	縣	縣	縣
生	生	生	生	生	生
員	員	員	員	員	員
張樹猷	曾宗洙	胡國柱	羅廣淵	吳之彥	陳炳文

名山縣志卷一

姓氏



名山縣志目錄

敘

卷一

圖說

星野

建置

疆域

形勝附

城池

公署

坊街

市鎮

卷二

山原

關隘

卷三

水道

津梁

卷四

學校上

卷五

學校下

卷六

名山縣志卷一

目錄



壇廟

卷七

寺觀

古跡

墳墓附

金石

卷八

物產

一二三

卷九

風俗

祥異

卷十

名山縣志卷一

目錄

二

戶口

田賦

津貼捐輸雜課經費附

鹽課

茶課

倉儲

蠲卹

卷十一

兵防

郵驛

典制

卷十二



職官

宦績

卷十三

選舉

列傳一

人士

卷十四

列傳二

忠節

列傳三

孝義

列傳四

方外

列傳五

列女

卷十五

外紀

名山縣志卷一

目錄

三




# 名山縣圖

名山縣志卷一

總圖

正東






按青衣縣地自西魏今置蒙山而後疆域畧有可  
 攷雖歷代裁併未大割裂惟城治似有遷改覽古  
 記載證以山川間有不洽然文獻缺佚無所據矣  
 懿自履斯土凡深山窮谷巨川細流靡不親踐而  
 探溯之七百餘日而來雖未周遍然歷歷在心目  
 間也為此圖仿崑山顧氏江陰六氏諸人之法計  
 里開方方為十里縣境之四至四隅山川城郭里  
 甲市鎮塘驛關隘悉繪註之庶乎為職方之所資  
 歟

名山縣志卷一

總圖






# 名山縣城圖

名山縣志卷一

三






古之為地理多有事於圖凡以著險隘坦夷也城郭濠塹尤司土職民者所必盡心境圖既列復規量為城圖若夫寓形勝存掌故昔之為政亦嘗有取乎此揀山川要者圖附之

名山縣志卷一

圖

四





# 蒙復儂茶

名山縣志卷一

圖

五







蒙頂山茶

名山縣志卷一

六

崑莪大蒙頂秀出五芙蓉沆瀣一氣連遠與元  
 圃通地靈草木異碧樹紛瓏璵香茗擅竒淑冠  
 絕西南封僊人何狡獪數株種其中吐納萬日  
 月元氣含鴻濛百靈為守護役使虎與龍昆兒  
 不敢採包貢  
 天九重神產夙所念西來得靈蹤金篋三百葉想像  
 郊壇供

趙怡



紫霞聖蹟





紫府飛霞洞帝君碑明  
葉侍講墓均在山內



名山縣志卷一

圖

八

何年赤城霞飛墮青衣陌化為九疊屏山城一  
水隔蒙嵐分紫翠羌波漾金碧林壑信深美僊  
靈所遊適神君昔化龍於茲安窟宅千年肖遺  
蛻洞天更誰闢碑字走蛟蛇傳聞是靈跡探竒  
有素懷捫讀至曛夕僧磬夜方初月林生淨魄  
仰視文昌星光芒正相射

趙怡



蓮嶺山





蓮峯夕眺



名山縣志卷一

圖

十

王母下邛崃使者三青鳥吐出萬蓮花崢嶸矗  
 雲表朝暎上扶桑射彩已娥媯盡日望不極夕  
 陽更明好金烏欲浴海拍翅瓊華島驚舒萬疊  
 霞幻作千錦藻娟娟仙帔修朵朵巫鬟裊青衣  
 作明鏡一照百窈窕遙知紫翠間定有木羊老  
 何當結茅龍從之拾瑤草

趙怡



青交奇畊

名山縣志卷一

圖

十一





青衣川  
多水車  
水碾村  
鄉風景  
最為可  
觀婦女  
率任耕  
作少蠶  
織惜不  
聞繰車  
絡維穀  
也

青衣春耕



東風幾十日吹綠青衣川臨川一以眺迴野春  
無邊藹藹遠原暉離離邨樹烟耕人滿南郭晨  
出晡始還昨日潑穀雨今朝晒秧天犁耨亂空  
翠高下隨芳阡少婦花邊餉人花相映妍羌歌  
互行荅髣髴蠶叢先今年雨暘適各媚田祖賢  
寄語勸農使寫我幽風篇

趙怡



緬甸晚鐘





唐落魄仙  
張守靈修  
道之所

宋都巡檢  
使曹公故  
里

棲霞晚鐘

玉液漱金碧琳宮煥崔巍  
仙人騎鶴去烟鎖青  
石扉落景下喬林  
輕霞橫翠微老僧上鐘閣  
數杵搖烟霏空山名虎伏  
暝壑呼龍歸悠哉百八  
叩天霜空際飛踈音度  
窳廓淡漾新月輝何處  
百丈磴答響遙鏗希  
行客就荒驛涼緒生秋衣  
羈懷坐空寂魚山清梵稀

趙怡






回龍潭水

名山縣志卷一

圖

十五





迴龍山以水勝與萬州之飛雪亭嘉州之方響洞相上下

迴龍瀑布



連山莽東走矯若蒼龍遊青冥忽昂首鬣揚  
天脩白日森蔽虧陰風入蕭颼怒噴雪玉涎百  
尺銀雲流翠壁乳花滑澄潭飛練投驪珠瀉千  
斛跳盪不可收瀕洞百雷霆中復鳴瑯球清寒  
漱石骨六月天為秋願濯雙白趺下駮青玉虬  
洒落水晶殿長隨龍女留

趙怡



# 石城夜月

名山縣志卷一

圖

七

石城夜月

石城山  
有八峯  
有金鷲  
池山寺  
孤迴天  
空月朗  
風景佳  
妙







北望雪嶺白南揖三峩青  
邛水渺東影羌波瞰  
西騰孤標四無着絕頂緣青冥  
披蘿凌紫霞縹  
緲白玉京琪烟下平野孤月生巖扃  
八峯杳岑  
寂萬象澄虛明  
高空碧無際河漢疑有聲  
下界  
若雲海一氣浮蓬瀛  
仙人倚桂樹來往無留形  
晃盪金鷲池濯髮身使輕

趙怡



羅維雪晴

名山縣志卷一

圖


九





羅繩縣  
巨州峽  
山之支  
山也  
陽春暖  
桃柳明  
娟而雪  
嶺界天  
白又  
異觀

羅繩雪晴



名山縣志卷一

圖

三

岷嶓氣不盡尻股遞邛笮盧奴千萬峯際天隱  
寥廓瞻望不可極娟妍間峩峩春風雪千尺一  
白界天末新晴天自高日暖雲初霽芳草極遙  
汀烟花滿村郭百里正明媚掩映紛眩曜如倚  
瓊玉峯齊張錦繡幕竒觀足心目忘歸恣遊屨  
欲就王摩詰畫稿論新拓

趙怡